

Jepun digesa tingkat kerjasama ekonomi dengan Malaysia

KUALA LUMPUR, Jumaat — Malaysia hari ini menggesa Jepun supaya meningkatkan kerjasama teknikal dan ekonominya dengan negara ini terutamanya dalam industri perkayuan bagi menentukan bekalan yang berterusan kepadanya.

Menteri Perusahaan Utama, Datuk Paul Leong Khee Seong berkata, dari segi pembalakan, Jepun boleh bekerja rapat dengan pembalakan-pembalakan di negara ini melalui bantuan teknikal.

"Bantuan teknikal ini boleh disalurkan melalui projek usahasama dengan pembalakan-pembalakan tempatan.

"Melalui usahasama ini juga, pembalakan tempatan akan dapat mempelajari keperluan ditetapkan oleh pengguna bahan keluaran mereka di Jepun," katanya dalam satu perjumpaan dengan peniaga-peniaga Balak Jepun hari ini. Ucapannya dikeluarkan di sini.

Bagi industri papan lapis, Datuk Leong menggesa pengusaha-pengusaha Jepun supaya memindahkan lokasi pengeluaran mereka ke Malaysia untuk menggu-

nakan sepenuhnya kelebihan komperatif yang dipunyai oleh negara ini.

Katanya, industri keluaran komponen perabot termasuk perabot rotan serta kayu masih mempunyai potensi yang baik bagi kemungkinan kerjasama.

Jelasnya, sektor pengeluaran perabot Jepun sudah dikenali sebagai sektor paling cepat berkembang di mana pengusaha tempatan dan Jepun mempunyai banyak persamaan.

Datuk Leong menambah, pengusaha tempatan mempunyai kemampuan untuk mengeluarkan bahagian serta komponen perabot bagi dipasang-siap di Jepun.

"Dengan bantuan pesat dari Jepun terutama dalam bidang pengeluaran serta pasaran, eksport negara dapat ditingkatkan.

Mengenai kayu getah, Datuk Leong berkata, setakat ini dari 70 peratus dari sembilan juta meter padu digunakan secara komersil.

Ujarnya, buat masa ini, ada 20 kilang memproses kayu getah untuk dieksport ke Jepun, Korea Selatan, Taiwan dan Singapura.